

Na osnovu člana 8. Zakona o principima lokalne samouprave u Federaciji Bosne i Hercegovine ("Službene novine Federacije BiH ", broj:49/06) i člana 55 i 104. Statuta općine Ilijaš ("Službene novine Kantona Sarajevo" broj: 20/09) Općinsko vijeće Ilijaš na -----sjednici, održanoj ---- 2016. godine, donosi:

O D L U K U

o uslovima i načinu držanja kućnih ljubimaca pasa i domaćih mački, načinu postupanja s napuštenim i izgubljenim životinjama i psima lualicama na području općine Ilijaš

I – OPĆE ODREDBE

Član 1.

Ovom se Odlukom propisuju uslovi i način držanja kućnih ljubimaca , registracija pasa, način postupanja s napuštenim i izgubljenim životinjama i psima lualicama na području općine Ilijaš.

Član 2.

Na području Općine Ilijaš mogu se u skladu sa ovom Odlukom držati kućni ljubimci koji ne ugrožavaju fizički i psihički integritet , ličnu sigurnost i imovinu građana, pri čemu uslovi gajenja moraju u potpunosti zadovoljavati njihovu dobrobit.

Odredbe ove Odluke ne odnose se na životinje koje služe za potrebe Ministarstva unutrašnjih poslova i Ministarstva odbrane BiH ,kao i službene pse vodiče osoba sa posebnim potreba.

II USLOVI I NAČIN DRŽANJA KUĆNIH LJUBIMACA

Član 3.

Imalac ili vlasnik kućnog ljubimca dužan je životinju držati u skladu sa propisima o zaštiti životinja, veterinarstvu, zaštiti okoliša, javnom redu i miru, te odredbama ove odluke.

Član 4.

Vlasnik ili imalac psa ili mačke obavezan je brinuti se o smještaju, ishrani i zdravlju psa ili mačke, a za oboljelog ili zaraženog psa ili mačku osigurati veterinarsku pomoć.

Vlasnik ili imalac psa ili mačke obavezan je provoditi propisane mjere sprečavanja oboljenja , suzbijanja i iskorijenjivanja zaraznih bolesti, pridržavajući se odredaba Zakona, drugih propisa i ove odluke.

Član 5.

U stambenoj zgradi sa više stanova dozvoljeno je držanje u stanu najviše jednog psa, odnosno dvije mačke.

Član 6.

Držanje kućnih ljubimaca u zajedničkim prostorijama zgrada i dvorištima zgrada, kretanje kućnih ljubimaca zajedničkim dijelovima zgrada, i dvorištima zgrada, te čišćenje

tih prostorija i prostora od fekalija kućnih ljubimaca zajednički utvrđuju suvlasnici zgrade, odnosno korisnici stanova uz saglasnost vlasnika.

Bez pismene saglasnosti potpisane od svih suvlasnika zajedničkih prostorija (u stambenom objektu i oko objekta) iste se ne mogu koristiti za držanje kućnih ljubimaca.

Član 7.

Na teritoriji općine Ilijaš u porodičnoj kući , okućnici porodične kuće , vrtu ili sličnom zemljištu nije dozvoljeno držati više od ukupno dva psa ili / i mačke.

Zabranjeno je na okućnici porodične kuće, vrtu i sličnom zemljištu psa držati na dijelu dvorišta okrenutom prema ulici odnosno istog je dozvoljeno držati na lancu ili u ograđenom dijelu dvorišta/prostoru koji nije okrenut prema ulici tako da ga pas ne može napustiti.

Na vidljivom mjestu imalac ili vlasnik psa mora postaviti oznaku koja upozorava na psa (npr. „čuvaj se psa“ i sl.)

Član 8.

U višestambenim zgradama pas ili mačka se nesmiju držati niti ostavljati na terasama i lođama.

Pas u neograđenom dvorištu ili vrtu mora biti vezan lancem i mora imati odgovarajuću kućicu uz vidljivo istaknuto upozorenje „Čuvaj se psa“.

Član 9.

U dvorištu porodične kuće ne smije se držati pas koji napada ljude i životinje , pas koji učestalim lajanjem i zavijanjem remeti mir građana.

Imalac ili vlasnik , čiji pas učestalim i dugotrajnim lajanjem ili zavijanjem remeti javni red i mir, dužan je odmah poduzeti odgovarajuće mjere kako bi spriječio daljnje uznemiravanje, ili je dužan ukloniti psa.

Član 10.

Pas se mora držati tako da ne ugrožava ličnu sigurnost građana.

Ako pas ozlijedi neku osobu , imalac ili vlasnik je dužan odvesti psa na pregled u nadležnu veterinarsku organizaciju na trokratni pregled te u slučaju tužbe i presude u korist oštećenog snosi troškove odštete.

Troškove trokrotnog pregleda psa snosi imalac ili vlasnik životinja.

Član 11.

Pas koji se drži u neograđenom dvorištu ili vrtu mora biti vezan lancem ili biti smješten u ograđenom prostoru koji će osigurati da se životinja neće moći samostalno udaljiti.

Imalac ili vlasnik životinje ne smije vezati psa na lanac koji je kraći od tri metra ili trostruke dužine životinje, mjereno od vrška repa do vrha njuške , a pri određivanju dužine lanca koristi se dužina povoljnija za životinju.

Član 12.

Pas koji se drži u ograđenom dvorištu ili vrtu ne mora biti vezan , uz uslov da ograda visinom i čvrstoćom osigurava sigurnost prolaznika.

Imalac ili vlasnik životinje koji drži psa na način utvrđen u stavu 1. ovog člana mora na vidljivom mjestu, staviti oznaku koja upozorava na psa, te mora imati ispravno zvono na ulaznim ili vrtnim vratima.

Član 13.

Na području naseljenih dijelova općine Ilijaš, imalac ili vlasnik je dužan voditi psa na uzici koja odgovara veličini i snazi psa, tako da ne ugrožava ličnu sigurnost ljudi i samih životinja, njihovo kretanje, te redovno odvijanje prometa.

Psi koji su zbog urođenih svojstava i agresivnog instikta opasni za sigurnost ljudi, a posebno dobermani, američki staforski terijeri, bullterijeri, pitbull terijeri, rotvajleri, doge, njemački i belgijski ovčari, japanski borilački psi, veliki japanski špicevi, mastifi, šarplaninci i njihovi križanci moraju se na području iz stava 1. ovog člana voditi na uzici, obavezno s brnjicom.

Član 14.

Izuzetno od člana 13. stav 1. ove odluke, psi se mogu kretati bez povodca, uz nadzor i odgovornost vlasnika na javnim površinama ako pas spada u grupu malih pasa (psi patuljastih pasmina).

Član 15.

Imalac ili vlasnik životinje smije izvoditi psa na javne površine, te prostore i prostorije javne namjene, ako je pas propisno označen i na povodcu i sa brnjicom.

Član 16.

Kućnim ljubimcima i psima i domaćim mačkama koji se kreću slobodno ili na povodcu zabranjeno je kretanje na tržnicama, grobljima, dječijim igralištima, cvijetnjacima, neograđenim sportskim terenima, kupalištima, te neograđenim dvorištima škola i vrtića.

Isto tako kućnim ljubimcima koji se kreću slobodno ili na povodcu zabranjeno je kretanje i na drugim javnim površinama, gdje je to posebnim znakom zabranjeno (znak sa prekriženim likom psa).

Član 17.

Imalac ili vlasnik životinje kućnog ljubimca psa ili domaće mačke dužan je pri svakom izvođenju na javnu površinu općine Ilijaš nositi pribor za čišćenje fekalija i očistiti svaku površinu koju njegov ljubimac onečisti.

Član 18.

Zabranjeno je stalno puštanje životinja u okolinu kao i privremeno puštanje u okolinu u toku sezone parenja.

Član 19.

Imalac ili vlasnik životinje dužan je kontrolisati razmnožavanje kućnih ljubimaca i pod svojim nadzorom, a snosi odgovornost i za sve potomke svojih životinja.

Način kontrole razmnožavanja kućnih ljubimaca mogu biti:

- Preventivno djelovanje (sterilizacija i kastracija životinja)
- Kontrola kretanja i vrijeme tjeranja ženki
- Upotreba veterinarskih sredstava

Poslove preventivnog djelovanja i upotrebe veterinarskih sredstava iz stava 2. ovog člana obavlja nadležna veterinarska organizacija.

Član 20.

Zabranjuje se provjeravati oštrinu psa na drugom psu ili životinji. Zabranjuje se huškati psa na čovjeka i ometati kretanje i sigurnost ljudi na javnim površinama i u zajedničkim prostorijama.

Zabranjuje se prodaja pasa ili mačaka na javnim mjestima.

Član 21.

U slučaju oboljenja psa ili mačke od zarazne bolesti, odnosno ako se sumnja da od nje boluje imalac ili vlasnik psa ili mačke, mora se o tome obavijestiti veterinarska organizacija, a psa ili mačku izolirati i zatvoriti dok se ne obavi veterinarski pregled.

Nakon veterinarskog pregleda psa ili mačke iz stava 1. ovog člana, imalac ili vlasnik je dužan postupiti prema uputstvima veterinarske organizacije ili veterinarske inspekcije i izvršiti naređene mjere.

Ako imalac ili vlasnik psa ili mačke, sumnja da je pas ili mačka uginuo/la od neke zarazne bolesti ili od trovanja dužan je uginuće psa ili mačke prijaviti nadležnoj veterinarskoj organizaciji.

Član 22.

Troškove naknade za veterinarsko-zdrastveni nadzor (pregled), cijepljenje i druge zdrastvene mjere provedene od strane veterinarske organizacije snosi imalac ili vlasnik psa ili mačke.

III -REGISTRACIJA PASA

Član 23.

Registracija pasa obavezna je za sve imaoce ili vlasnike pasa na području općine Ilijaš, što se potvrđuje posjedovanjem vlasničke knjižice izdate i ovjerene od strane registrovane veterinarske organizacije.

Registracija pasa ili upisivanje pasa u upisnik vrši se radi provođenja mjera propisanih Zakonom i ovom Odlukom, a naročito radi sprečavanja bjesnoće i drugih zaraznih bolesti.

Za sve imaoce ili vlasnike pasa na području općine Ilijaš registraciju vrše registrovane veterinarske organizacije.

Veterinarska organizacija imaocu pasa će izdavati službenu ispravu čiji je sadržaj i oblik propisan Zakonom o veterinarstvu FBiH, a svi imaoći ili vlasnici pasa obavezni su upisati iste u registar.

Troškove registracije psa snosi vlasnik.

Član 24.

Svi psi stariji od tri mjeseca podliježu obaveznoj registraciji i cijepljenju protiv bjesnoće.

Registraciju cijepljenja pasa vrše registrovane veterinarske organizacije.

S ciljem identifikacije sve životinje trajno treba da budu označene, a imaoći pasa i domaćih mačaka dužni su izvršiti trajno označavanje pasa i mačaka pomoću mikročipa koje izvode samo veterinari. Zabranjeno je uklanjanje mikročipa, osim u slučaju ako zato postoje samo opravdani zdrastveni razlozi.

Imalac ili vlasnik životinja čiji pas je dostigao starost od tri mjeseca, odnosno koji je nabavio ili prodao psa, dužan je o tome u roku od sedam dana obavijestiti veterinarsku organizaciju koja vodi upisnik (registar) pasa.

Imalac ili vlasnik psa dužan je registrovanoj veterinarskoj organizaciji koja vodi upisnik (registar) pasa prijaviti uginuće psa radi utvrđivanja uzroka uginuća i ažuriranje baze podataka o registraciji životinja.

Higijenskom servisu imalac ili vlasnik psa dužan je prijaviti gubitak ili bijeg psa u roku od tri dana od dana gubitka ili bijega psa, uz dostavu vlasničke knjižice veterinarske organizacije.

Imalac ili vlasnik koji iz bilo kojeg razloga nije umogućnosti nastaviti brigu o psu istog treba predati Higijenskom servisu radi daljeg zbrinjavanja.

IV – NAČIN POSTUPANJA SA IZGUBLJENIM, NAPUŠTENIM ŽIVOTINJAMA I PSIMA LUTALICAMA

Član 25.

Izgubljene pse, napuštene pse i mačke, kao i pse lualice skupljaju ovlaštena lica JKP "Vodostan" doo Ilijaš, čiji je osnivač Općina Ilijaš, a koji će registrovati djelatnost za poslove Higijenskog servisa. Navedene poslove nemogu obavljati druga fizička i pravna lica na području općine Ilijaš.

Higijenski servis će ispunjavati uslove shodno Pravilniku o osnivanju i uslovima koje moraju ispunjavati higijenski servisi.

Za potrebe rada Higijenskog servisa Općina Ilijaš će obezbijediti odgovarajuću lokaciju.

Sredstva za izgradnju i opremanje higijenskog servisa obezbjeđuju se iz Budžeta Općine Ilijaš.

Higijenski servis će zbrinjavati životinje u skladu sa Zakonom o zaštiti i dobrobiti životinja i Zakonom o veterinarstvu, te podzakonskim aktima donesenim na osnovu ovih zakona.

Nalaznik napuštene ili izgubljene životinje dužan je o nalasku obavijestiti Higijenski servis i pružiti životinji odgovarajuću skrb do vraćanja imaocu ili vlasniku do smještaja u Higijenski servis.

Član 26.

Troškove zbrinjavanja životinja od strane Higijenskog servisa snosi imalac ili vlasnik životinje, a ako se isti ne utvrdi troškovi zbrinjavanja/obezbjeđuju se iz budžetskih sredstava Općine Ilijaš i drugih Zakonom propisanih vidova finansiranja, osim ako se imalac ili vlasnik naknadno ne utvrdi.

Visinu naknade za zbrinjavanje životinja od strane higijenskog servisa, koje snosi imalac ili vlasnik životinje utvrđuje nadležni organ upravljanja u JKP „Vodostan“ doo Ilijaš

V NADZOR

Član 27.

Nadzor nad provedbom odredbi iz ove odluke obavlja komunalni inspektor općine Ilijaš u saradnji sa nadležnom veterinarskom inspekcijom.

Veterinarski inspektor u skladu sa Zakonom o veterinarstvu, Zakonom o zaštiti i dobrobiti životinja, Pravilnikom o opasnim psima, Pravilnikom o osnivanju i uslovima koje moraju ispunjavati higijenski servisi vrši nadzor u slučajevima kršenja odredbi ove Odluke iz člana 3.,4.,10.,13., stav 2., člana 18., 19., 20., stav 1., člana 21.,23.,24. i 25.

Komunalni inspektor u skladu sa svojim ovlastima vrši nadzor i poduzima radnje pri provođenju odredbi iz člana 5.,6.,7.,8., 9., 11., 12., 13., stav 1., člana 15., 16., 17. i 20. stav 2.

U slučaju da prilikom vršenja inspeksijskog nadzora komunalni ili veterinarski inspektor ustanovi da pravno ili fizičko lice krši odredbe ove Odluke , isti ima pravo da legitimije lice radi postupanja u skladu sa istim.

Ukoliko komunalni ili veterinarski inspektor u svom radu naiđe na otpor može zatražiti pomoć službenika nadležne policijske uprave.

Policijski službenici također su, u granicama svojih ovlasti, na zahtjev nadležne komunalne ili veterinarske inspekcije , dužni osigurati pomoć pri provođenju inspeksijskog nadzora postupanja.

VI KAZNENE ODREDBE

Član 28.

Fizičko lice će se kazniti novčanom kaznom u iznosu od 100,00 KM , odgovorno lice u pravnom licu u iznosu od 500,00 KM , a pravno lice će se kazniti u iznosu od 1.000,00 KM, koje prekrši član 3.,4.,5.,7.,8.,11.,12.,13. stavu 1., član 15.,16.,17., 18. i 19. ove Odluke.

Fizičko lice će se kazniti novčanom kaznom u iznosu od 300,00 KM , odgovorno lice u pravnom licu u iznosu od 1.000,00 KM , a pravno lice će se kazniti novčanom kaznom u iznosu od 2.500,00 KM koje prekrši član 6.,9., 10., 13. stav 2. član 20.,21.,23.,24. i 25. ove Odluke i koje spriječi higijeničara ili druga lica koje imaju pravo nadzora i vršenju poslova predviđenih ovom Odlukom.

Komunalni inspektor će u slučajevima kada ustanovi kršenje odredaba ove Odluke pokrenuti prekršajni postupak protiv okrivljenog podnošenjem zahtjeva za pokretanje prekršajnog postupka nadležnom sudu, u skladu sa Zakonom o prekršajima Federacije Bosne i Hercegovine („Službene novine Federacije BiH“ , broj 31/06).

VII – PRELAZNE I ZAVRŠNE ODREDBE

Član 29.

U predmetnoj Odluci korišteni su pojmovi čije značenje je utvrđeno članom 2. Zakona o zaštiti i dobrobiti životinja.

Član 30.

Higijenski servis će provoditi odredbe ove Odluke , s tim da će u slučaju potrebe za provođenje iste obezbijediti saradnju sa drugim pravnim licima iz ove oblasti.

Član 31.

Ova Odluka stupa na snagu danom objavljivanja u „Službenim novinama Kantona Sarajevo.“

Broj: 01/1-----/16
Ilijaš, -----2016. god.

P R E D S J E D A V A J U Ć I
OPĆINSKOG VIJEĆA
Filipović Damir, s. r.

Na osnovu člana 104. Statuta općine Ilijaš- prečišćeni tekst („Službene novine Kantona Sarajevo“ br. 20/09) , člana 99. Poslovnika o radu Općinskog vijeća Ilijaš („Službene novine Kantona Sarajevo „ br. 2/10 i 18/15), Općinsko vijeće Ilijaš na svojoj 39. sjednici održanoj 31.03.2016. godine , donijelo je:

ZAKLJUČAK

Član 1.

Prihvata se Nacrt Odluke o uslovima i načinu držanja kućnih ljubimaca pasa i domaćih mački, načinu postupanja s napuštenim i izgubljenim životinjama i psima lualicama na području općine Ilijaš i stavlja na javnu raspravu.

Član 2.

Nacrt Odluke o uslovima i načinu držanja kućnih ljubimaca pasa i domaćih mački, načinu postupanja s napuštenim i izgubljenim životinjama i psima lualicama na području općine Ilijaš stavlja se na javnu raspravu kako slijedi:

- objavom putem web stranice općine Ilijaš
- objavom na oglasnoj ploči općine Ilijaš

U javnoj raspravi učestvovat će: građani, mjesne zajednice, političke stranke i ostale asocijacije i udruženja građana.

Član 3.

Javna rasprava o Nacrtu Odluke o uslovima i načinu držanja kućnih ljubimaca pasa i domaćih mački, načinu postupanja s napuštenim i izgubljenim životinjama i psima lualicama na području općine Ilijaš se određuje u trajanju od 20 dana , počev od 1. 04.2016. godine do 20. 04. 2016. godine.

Član 4.

Nakon provedene javne rasprave primjedbe i prijedlozi će se dostaviti Službi za privredu, finansije i investicije u pisanoj formi ili putem e-maila, najkasnije do 21. 04. 2016. godine – do 15, 00 sati.

Primjedbe i prijedlozi dostavljeni poslije navedenog roka neće biti uzeti u razmatranje.

Član 5.

Ovaj Zaključak stupa na snagu danom donošenja.

Broj: 01/1-----/16
Ilijaš, ----- 2016. godine

**PREDSJEDAVAJUĆI
OPĆINSKOG VIJEĆA ILIJAŠ**

Filipović Damir